

## Sambutan Peringatan Hari Polis Ke-215 disambut ringkas, sederhana

Oleh Nor Azizah Mokhtar dan Suzalina Halid - Mac 25, 2022 @ 10:40am  
bhnews@bh.com.my



Perbarisan Peringatan Hari Polis Ke-215 Tahun 2022 di Pusat Latihan Polis Kuala Lumpur hari ini. - Foto NSTP/Aswadi Alias

KUALA LUMPUR: Sambutan Peringatan Hari Polis Ke-215 yang berlangsung di Pusat Latihan Polis (PULAPOL) Kuala Lumpur di sini, sambut secara ringkas dan sederhana dalam mod pematuhan prosedur operasi standard (SOP) sepenuhnya.

Perdana Menteri, Datuk Seri Ismail Sabri Yaakob hadir sebagai tetamu kehormat utama dalam sambutan kali ini yang mengekalkan tema sama 'Polis dan Masyarakat Berpisah Tiada'.

Yang turut hadir, Menteri Dalam Negeri, Datuk Seri Hamzah Zainuddin, Ketua Polis Negara, Tan Sri Acryl Sani Abdullah Sani dan Panglima Angkatan Tentera Malaysia (ATM), Jeneral Tan Sri Affendi Buang.

Sambutan dimulakan dengan pasukan kawalan kehormatan masuk ke dalam medan perbarisan, sebelum panji-panji utama Polis Diraja Malaysia (PDRM) diarak masuk mengambil tempat.

Perdana Menteri kemudian memeriksa perbarisan dengan menaiki kenderaan istiadat, sebelum acara dilengkapkan perbarisan lintas hormat 102 anggota kawalan kehormatan utama dari Pasukan Simpanan Persekutuan (PSP) PDRM.

Perbarisan diketuai Deputi Superintendant Mohd Zulfadly Zulkifli dibantu Asisten Superintendant Mohd Shafiq Ghazali bersama pegawai pembawa panji-panji, Inspektor Mohd Farid Mohd Anuar.

Ketua Polis Negara, Tan Sri Acryl Sani Abdullah Sani, dalam ucapannya berkata, seluruh warga PDRM memperbaharui sumpah taat setia kepada raja dan negara serta berikrar memastikan keselamatan rakyat dan kedaulatan negara terus terpelihara sempena sambutan Peringatan Hari Polis Ke-215 hari ini.

"Seluruh warga PDRM akan melaksanakan tugas secara profesional dan terus memperkasakan integriti demi mempertahankan keluhuran Perlembagaan dan kedaulatan undang-undang.

"Selain itu, sentiasa 'Sedia Berkhidmat' dan berdiri teguh di bawah naungan panji Sang Saka Biru untuk memikul tanggungjawab dan amanah bagi memelihara keselamatan masyarakat dan keamanan negara" katanya.

Beliau berkata, selari dengan kehendak Akta Polis 1967, PDRM akan terus komited dalam mempertahankan keselamatan dan ketenteraman awam negara.



Perdana Menteri Datuk Seri Ismail Sabri Yaakob ketika menghadiri Perbarisan Peringatan Hari Polis Ke-215 Tahun 2022 di Pusat Latihan Polis Kuala Lumpur, hari ini.

"Dalam usaha memantapkan sistem penyampaian perkhidmatan pasukan, kerajaan dan Kementerian Dalam Negeri (KDN) sudah meluluskan perolehan aset dan peralatan seiring dengan kemajuan teknologi terkini kepolisan moden.

"Saya mewakili PDRM mengucapkan setinggi-tinggi penghargaan kepada kerajaan dan KDN yang amat prihatin akan keperluan PDRM," katanya.

Acryl Sani berkata, kerajaan juga memperuntukkan dana yang besar untuk kebajikan, keselesaan dan kesejahteraan warga PDRM yang berkhidmat serta seisi keluarga, di samping pesara polis.

Pada majlis itu, Hamzah turut menyampaikan sijil Anugerah Integriti PDRM sebagai penghargaan dan pengiktirafan tertinggi kepada pegawai, anggota polis serta kakitangan awam yang diperakui menunjukkan pencapaian integriti di tahap terbaik.